

**Mana lebih penting bagi BN, Ibrahim Ali atau 1Malaysia?
Malaysian Insider
April 8, 2013
Oleh Jahabar Sadiq**

KOMEN, 8 April — Barisan Nasional (BN) telah melancarkan manifesto mereka yang secocok dengan falsafah 1Malaysia akan tetapi sokongan Tun Dr Mahathir Mohamad terhadap Datuk Ibrahim Ali sebagai calon gabungan pemerintah itu dilihat bertentangan dengan konsep tersebut.

Presiden Pertubuhan Pribumi Perkasa Malaysia (Perkasa) itu dilihat seringkali bertentangan dengan konsep 1Malaysia dengan memperjuangkan hak Melayu dikala pengerusi BN Datuk Seri Najib Razak memperkenalkan liberalisasi ekonomi dan ekuiti untuk rakyat Malaysia.

Akan tetapi mengapa perdana menteri paling lama berkuasa yang bercakap soal Bangsa Malaysia pada tahun 1991 menyokong Ibrahim — mengamalkan garis perkauman dan bertanding dalam Pilihan Raya 2008 di bawah tiket PAS dan hanya menyokong Umno kembali selepas menang di kerusi Pasir Mas?

“Saya harap BN akan bagi tempat kepada Ibrahim Ali untuk bertanding. Jika Ibrahim dijadikan calon saya akan pergi ke Pasir Mas, untuk berkempen,” Dr Mahathir berikrar hujung minggu lalu dan menambah “Kalau ada banyak orang macam Ibrahim ini, Malaysia akan selamat.”

Apakah Dr Mahathir mempromosikan Ibrahim Ali (gambar) yang mengugut untuk membakar bible berbahasa Melayu? Ibrahim Ali yang mahukan jaminan terhadap pengelibatan Bumiputera dalam projek infrastruktur walaupun selepas Putrajaya mengatakan ianya perlu dilakukan mengikut merit.

Berapa selamat Malaysia jika Ibrahim kekal dalam politik? Atau adakah ini hanya satu lawak jenaka?

Satu perkara mengenai Dr Mahathir. Beliau membela orang-orangnya. Beliau membela Tun Dr Ling Liong Sik dalam perbicaraan rasuahnya. Sekarang beliau membela Ibrahim yang pernah beliau jadikan timbalan menteri menguruskan hal ehwal undang-undang.

Dr Mahathir juga merupakan penaung Perkasa. Lagipun Ibrahim telah menjadi panglimanya semenjak ahli politik veteran itu menamatkan karier politik Datuk Seri Anwar Ibrahim dalam Umno dan kerajaan.

Ibrahim juga mungkin berguna jika diperlukan untuk menggoncang kepimpinan tertinggi Umno jika BN tidak mendapatkan pencapaian baik dalam pilihan raya paling sengit ini.

Kedua-duanya berkongsi kebencian kepada Tun Abdullah Ahmad Badawi. Ibrahim meninggalkan Umno selepas Abdullah menjadi presiden parti dan perdana menteri. Akan tetapi Ibrahim seringkali keluar masuk parti politik sehingga beliau di gelar “katak”.

Fakta paling mudah adalah kedua-dua Dr Mahathir dan Ibrahim berkongsi menyukai cara politik lama ahli Umno dan pengundi yang lebih percaya dengan personaliti dan bukan polisi. Dan bukan dengan pengundi baru dan muda yang mahu Malaysia yang lebih inklusif dan bukan eksklusif.

BN harus berfikir panjang untuk bersetuju dengan nasihat Dr Mahathir agar memberikan kerusi kepada Ibrahim Ali dibawah bendera mereka. Kerana Malaysia adalah lebih daripada 400,000 penyokong Perkasa yang menuntut hak Melayu yang telahpun dijamin oleh Perlembagaan Persekutuan.

Empat tahun 1Malaysia telah membuktikan bagaimana BN boleh capai dengan pendekatan pertengahan. Mana-mana penyelewengan akan menyebabkan BN kehilangan undi, walaupun terdapat pelbagai idea dalam manifesto mereka.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/mana-lebih-penting-bagi-bn-ibrahim-ali-atau-1malaysia/>